

四書逸箋







四書逸箋

程大中撰

叢書集成初編

(補印本)

四書逸箋

一九三七年十二月初版

一九五九年十月補印

商務印書館出版

上海華文印刷廠印刷



叢書集成
初編

商務印書館

本館叢書集成初編所選墨
海金壺及海山仙館叢書粵
雅堂叢書湖北叢書皆收有
此書湖北本最後出然於海
山粵雅所校訂者悉已彙入
且刊印較精故據以排印並
附墨海金壺本所載提要於
後

四書逸箋提要

四書逸箋六卷

國朝程大中撰。大中字拳時，號是菴，應城人。乾隆丁丑進士，是編採諸書之文與四書相發明者，或集注所已引而語有舛誤，或集注所未發而義可參訂，皆爲之箋其出處，其與集注小異者，則爲附錄。其他書中所載四子書文與今本異者，則爲附記。第六卷中，則專考四書人物遺事，又雜事數十條，別爲雜記。援據頗極詳明。中如束帶一條，不引玉藻肆束及帶勤者有事則收之之文，朋友死無所歸一條，引白虎通而不引檀弓。夫子曰生於我乎館死於我乎殯之文，屢無夫里之布一條，集注止引載師職，而此不引閭師職。凡無職者出夫布之文以補之，未免疎漏。至雜記內因論語有夢周公一語，遍引堯舜禹文諸夢事，如夢書六帖，皆爲引入，亦稍涉泛濫。然詞皆有據，雖不能與閻若璩四書釋地並駕齊驅，較張存中之通證詹道傳之纂箋，要無所讓也。

右四書逸箋六卷。國朝程大中撰。按大中字拳時。號是菴。應城人。乾隆丁丑進士。是書四庫提要已著錄。學海堂諸同志曾以聚珍版印行。曾冕士廣文跋。稱其考核淹貫者也。內如夷齊采葛一條。本韓子通解。云罕見引用。而郎瑛七修類稿已載。謂夷齊采薇而食。言之者多矣。采葛以爲衣。則諸本所無也。云云。又老彭一條。引王弼曰。老老聃。彭彭祖。而彭祖實卽老聃。邢昺疏。殆據世本史記。又如市井一條。稱古者因井爲市。故曰市井。無他義也。云云。然不如引後漢書循吏傳。白首不入市井。注春秋井田記云。因市爲井。交易而退。故稱市井。語較爲有據。至束脩一條。所引證與陔餘叢考略同。趙甌北與同時。未必互相沿襲。至如五畝之宅一條。陔餘叢考遍引羣書。辨二畝半在田。二畝半在邑之說。固不如此書引趙氏曰。古二畝半。當今一畝十步。則五畝止。當今二畝二十步。云云。更爲了當。至周人葬伯夷以將軍之禮一條。本韓非儲說。或疑其妄。然將軍官名已古。後漢書西南夷傳。帝嚳時。有吳將軍。或不可信。而國語鄭文公。以詹伯爲將軍。左傳。豈將軍食之而有不足。檀弓。將軍文子。孟子。慎子爲將軍。則周初有將軍官名。未必定韓非臆撰。要其詞皆有據。亦讀四子書者所宜參稽旁及者矣。道光庚戌立冬令節。南海伍崇曜謹跋。

右四書逸箋六卷。攷核淹貫。惟所引宏明集。予族不知其出史記。列女傳舜妹繫。不知其爲擊之誤。而誤分繫與黻手爲二人。擊實黻手之合體。師古注漢書已辨之。蓋偶有不照。不足爲是書病也。世閒流傳頗少。曾刻于光華增訂雜錄中。名四書識遺。不分卷。此從張海鵬墨海金壺本。以于本校之。如夫里之布條引孫奭云。不知言布參印書者何見。張本者何二字作未之。小國井田之數條。三分去一。除田七十五萬畝。張本作七千五百畝。記刑第五條引漢書刑法志。完者使守積。張本作刑者使守積。皆擇善而從。其有兩通者。如黻首于本作黻手。雖與漢書人物表。史記正義。初學記合。而黻首亦見說文。未詳孰是。今姑從張本。至於兩書同誤。如沽酒條引周禮賈公彥疏。作孔穎達。置郵條引集註。作集句。似皆原本筆誤。今輒改正。古者校定舊籍。不敢泯其故書。然分綴句下。頗嫌行閒斷續。別爲一篇。又不成卷。茲附著於此。俾讀者有攷云爾。道光癸巳十二月。南海曾釗記。

四書逸箋目錄

卷一 上 論語

時習

孟懿子

公冶長名

治賦

朽

居蔡

粟九百

飲射讀法

束脩

三讓

太宰

寢衣

程註說樂

管仲字

瑚璉

束帶

子產氏

子桑伯子

伯牛有疾

兩宋朝

陳司敗

服事

後生章集註引曾子

沽酒

切磋琢磨

三歸

桴

賓客

晏平仲諡

仲弓節集註引家語之誤

下邑

老彭

請禱章

麻冕

緼袍

讎

問人他邦

朋友節

山梁雌雉節

附錄

爲政章

子游問孝章

八佾

問社

宰予晝寢章

又

必有忠信章

學易章

齊必變食章

卷二 論語

請車章

長府

閔子侍側章

冉求聚斂

鼓瑟希

與點

顏淵問仁章

折獄章

襁負

誦詩

南宮适

羿

夫子不答

東里

子西

駢邑三百

卞莊子

石門

夷俟

九月在陳

東蒙

分崩離析

陪臣

景公千駟

周人葬伯夷以將軍之禮

夷齊採葛

邦君之妻

又

二南

箕子名

周有八士

附錄

吾豈匏瓜節

附記

撰論語

論語逸篇

文選注引逸論語

卷三

大學
中庸

盤

淇澳

絜矩

性情

陽貨

稻

耦耕

民食喪祭

宰我問喪章

古論語

太平御覽引逸論語問玉篇

論語逸句

邦畿千里

淇竹

楚書

獲

澶

微子抱器歸周

以杖荷蓀

論語策

說文引逸論語

緡蠻邱隅

藁竹

聚斂盜臣

柯

正鵠

燕毛

華嶽

文書名

附錄

齊其家節

附記

鄭氏大學中庸目錄

二程大學定本

卷四 孟子上

麋鹿

五畝之宅

作俑

覺鐘

鼓樂

帑

方策

卷石

綱

反古之道

古本大學

靈臺

頌白不負戴

易耨

術

文王之囿

宗器

蒲盧

軌

石經大學

填

餓莩

孟子見梁襄王章

寡妻

郊關

入國問禁

轉附朝饗

鰥寡孤獨

囊橐

爰方啓行毛註

太王屬耆老

從之者如歸市

嬖人

三鼎五鼎

公孫丑

置郵

微仲

比干

孟賁

麒麟

塵

夫里之布

耕稼陶漁節

東郭氏

孟仲子

景丑氏

兼金一百

在薛節

持戟失伍註

蚺鼈諫王節

王驩攝卿

反齊止嬴

中古棺七寸

勸齊伐燕

季孫子叔疑

龍斷

滕文公滕定公

乘屋

井地

滕壤地田數

徙字註

大略

衣褐

稼穡

記墨者弟子

詭遇

淫移屈

與葛爲鄰

戴不勝

莊嶽

段干木

今茲

營窟

墨翟姓名

陳仲子

於陵

卷五

孟子下

兩離婁

泄泄沓沓

女吳二事

滄浪

壙

七年之內

瞽瞍

舜生諸馮章

負夏之負訓海

疾作註

西子遺事

帝使九男

舜弟妻兄妹

南河之南

舜居堯喪

舜之子

屈產

去其籍

大國井田之數

附庸

館甥貳室

擊柝註譌

臺無餽

市井之臣二句本儀禮

市井

告子

湍水

自羽之白四句

易牙名

孫氏疏引奕秋語

韓詩外傳引放心章

趙孟

膏梁

曹交

礪

杞梁之妻

束牲載書

白圭治水

范

記曾子不忍食羊棗

附錄

黎民

君子之澤章

追蠡

坵記

孟子逸篇

計十七則

卷六

四書人遺事

孔子則記此下至孟子凡二十事孔孟及諸賢遺事

子路

子羔子貢

南陽

饑餓

革車虎賁

記近聖人之居二句

折枝

稅冕

既入其苙

孟子逸句

顏回

子張

子思

滑釐

疇古註

盆成括

符節

邱民

曾子

宰子

孟子

四書逸箋目錄

神農此下至幽王凡六十

禹

王季

桀

后稷此下至張儀凡五十事

丹朱

鯀

比干

周公

管仲

段干木

雜記此下類記四書所載人物雜事

記形體則十三

記夢九則

記撰著則十六

堯

啓

文王

紂

皋陶

驩兜

伊尹

箕子

太公

子產

梁惠王

舜

湯

武王

幽王

伯益

三苗

傅說

夷齊

召公

孫叔敖

張儀

記嗜好五則

記書十則

四書逸箋卷一

清應城程大中撰

論語上

時習

邢昺論語疏引皇氏云學有三時、一身中時、二年中時、三日中時。按宋儒謂時習爲學之不已。自兼三時言。從來講章皆未之及。

程註說樂

在內曰說、在外曰樂。見邢疏。不始於程子也。

切磋琢磨

爾雅、骨謂之切、象謂之磋、玉謂之琢、石謂之磨。今集註改象爲角。

孟懿子

仲謂之孟者、禮疏古者適長謂之伯、庶長謂之孟、桓公適子莊公爲君、而大夫不敢祖諸侯、仲孫於三家爲庶長、三家所宗謂之孟。

管仲字

管夷吾字仲。其父名山。亦字仲。見陳心叔名疑。

三歸

三歸事。見說苑善說篇。四書通引馮氏云。以民歸之。左右與之。故謂之三歸。包咸論語注曰。三歸娶三姓女。婦人謂嫁曰歸。說苑注亦云。仲一娶三姓。而備九女。故築三歸之臺以處之。朱子或問引舊說。蓋取娶三姓之義。仁山金氏謂算家有築三歸臺法。與此章書旨無涉。

公冶長名

公冶長名芝。字子長。見范甯論語注。

瑚連

集註夏曰瑚。商曰連。本包咸。鄭玄注。據明堂位。當云。夏連。商瑚。夏后氏之四連。殷之六瑚。朱子從包鄭。因夏商便文也。

桴

馬融注桴。編竹木大者曰楫。小者曰桴。今集注。訓桴爲筏。按筏與楫音義同。是以大者爲桴也。

治賦

古者田有正賦。有旁加。不皆出兵。周禮。甸六十四井。出車一乘。此正賦也。甸卽十里爲成。成則兼旁加三十六井。旁加之夫。止治溝洫疆界。不與出兵之數。

束帶

古人無事則緩帶。有事則束帶。說字云。在腰爲腰帶。在胸爲束帶。腰帶低緩。束帶高緊。公西華束帶立朝。蓋當有事之際。倉卒立談。可以服彊鄰。卽折衝尊俎之閒意。泛作禮服非。

賓客

大曰賓。小曰客。爲君臣之別。見周禮注。

朽

釋名云。鏹謂之朽。郭璞注。泥塗也。師古注云。朽。所以泥。然則朽非卽泥。乃所以泥塗之具也。

子產氏

集註子產。公孫僑也。據春秋世譜。子產乃公子發字。子國之子。以其出於公族。故氏公孫。

晏平仲諡

史記索隱考晏嬰諡平。字仲。

居蔡

食貨志。元龜爲蔡。非四民所得居。鄭氏云。龜出蔡地。因以爲名。寰宇記。蔡山出大龜。尙書曰。九江納錫大龜。卽此山之龜也。按孔穎達正義曰。鄭注非也。書曰。九江納錫大龜。大龜不出蔡國也。按寰宇記。蔡乃山名。則鄭說是。

子桑伯子

鄭玄論語注云。子桑伯子。秦大夫。蓋以秦有公孫枝。字子桑也。

仲弓節集註引家語之誤

集註引家語記伯子不衣冠而處。夫子譏其同人道於牛馬。元詹道傳纂箋曰。今家語無其文。集註誤也。伯子事載說苑修文篇。孔子見子桑伯子。子桑伯子不衣冠而處云云。同人道於牛馬一句。乃劉向之言。向云文質修者謂之君子。有質而無文謂之易野。子桑伯子欲同人道於牛馬。故仲弓曰太簡。集註蓋記錄之誤耳。

粟九百

集註九百不言其量不可考。按孔注九百九百斗。

伯牛有疾

淮南子精神篇。子夏失明。伯牛爲厲。厲卽癩也。故包注云伯牛有惡疾。今集註先儒以爲癩也。未審先儒何指。按包注牛有惡疾不欲人見。故孔子從牖執其手與。集註異。

下邑

武城魯下邑。本包咸注。吳氏程曰。魯下邑。附郭之邑。猶今言城下邑也。

飲射讀法

周禮一年之間行鄉飲酒凡三。州長習射春秋凡二。黨正蜡祭一。行鄉射凡二。州長春秋以禮會民皆行鄉射禮。行讀法凡二十有五。古者官司之與民屬其勤如此。宜夫士之自愛者多也。羣書百考云。州長每以正月正歲及春秋祭社。屬民及正歲屬民讀教法。一年凡七。族師每月朔及春秋祭。屬民讀法。一年凡十四。合計之。一年之間凡二十五讀法。

兩宋朝

宋兩公子朝皆曰宋朝。一爲司寇。乃桓公弟。一出奔衛。論語宋朝之美是也。

老彭

正義引王弼云。老是老聃。彭是彭祖。

束脩

束脩解有二。鄧后紀云。故能束脩不觸網羅。注以約束。脩整釋之。他如鄭均。束脩安貧。恭儉節整。馮衍傳。圭潔其行。束脩其心。劉般。束脩至行。俱如前解。此與今集註異者。周禮膳夫。掌內脩之頒賜。鄭注。脩脯也。檀弓云。束脩之問不出境。少儀云。其以乘壺酒。束脩一犬。賜人。穀梁傳。束脩之問。不行境中。此皆從脩脯義。唐六典。國子生初入。置束帛一篋。酒一壺。脩一案。爲束脩之禮。卽自行束脩義也。朱子據經釋經。不得取史傳相詆論語類考。主集註脩脯義。獨疑十脰爲束之說。古今不相通。按少儀壺酒束脩疏云。束脩十脰脯也。集註蓋本此。杜詩。蕭伏湛疏。自行束脩。訖無毀玷。延篤云。吾自束脩以來。爲臣子忠孝。交不詔。濱解者謂十五以上。此又一義。

陳司敗

鄭玄論語注。陳司敗。人名。齊大夫。必有所本。

請禱章

人知子疾病。子路請禱。不知孔子病。子貢出卜。太平御覽引莊子云。孔子病。子貢出卜。孔子曰。子待也。吾

坐席不敢先居處若齋飲食若祭吾卜之久矣此與請禱事相類從未經人引用

三讓

儀禮三遜謂之終遜三以天下讓猶言終以天下讓也朱子或問亦云再辭為固辭三辭為終辭則集註固遜宜作終遜邢疏云太王疾太伯適吳越採藥太王沒而不返季歷為喪主一讓也季歷赴之不來奔喪二讓也免喪之後遂斷髮文身三讓也又程子不立一也逃之二也文身三也二說皆指實言之

服事

叢說云禹貢五服之內所封諸侯朝貢皆有時各依服數以事天子故曰服事

麻冕

集註麻冕緇布冠也本孔注論語纂箋曰冕者天子至大夫之祭服冠者自天子至庶人之常服也冕如周禮弁師掌王之五冕書稱康王卿士邦君太保太史太宗皆麻冕蔡氏云以三十升麻為之是也今以緇布冠名之蓋因孔注云冠者首服之名冕者冠之別號而誤耳

太宰

鄭注太宰吳太宰嚭也正義曰此據左傳哀十二年公會吳於橐皋吳子使太宰嚭請尋盟公不欲使子貢對又子貢嘗適吳故鄭以為是太宰嚭也

後生章集註引曾子

大戴禮脩身篇曾子曰年三十四十之閒而無藝則無藝矣五十而不以善聞則不聞矣七十而未壞雖

有後過亦可以免矣。

緇袍

說字以絲爲著曰繭衣。以麻爲著曰緇袍。

寢衣

孔注寢衣今之被也。與集註一半覆足之說正自相通。

沽酒

鄭氏注酒正職云。既有米麴之數。又有功沽之巧。賈公彥疏云。功沽謂善惡。蓋酒之善者爲功。惡者爲沽。集註從正義。沽買也。緣與市字一類耳。周禮昔酒取其久也。一宿曰宿。再宿曰沽。此又一義。

讎

譙周論語注曰。讎卻之也。

問人他邦

論語疏問猶遣也。或自有事而問人。或聞彼有事而問之。悉有物以表其意。故曲禮云。凡以弓劍苞苴篚筥。問人者。操以受命。如使之容。按古人篤於友誼。因問遺物。厚也。拜送使者。敬也。集註因遺字添出。故不取。然於義未害。

朋友節

白虎通引論語云、朋友無所歸、生於我乎館、死於我乎殯、多中一句、文義尤備、近秀水朱氏採入經義考論語逸句中。

山梁雌雉節

山梁節無確註、邢氏說尤非、按呂覽子路掩雉而復釋之、則其當爲拱執之義、嗅爲飛鳴聲、無疑也。

附錄凡與集註小異者、附誌之以備一說。

爲政章

論語注疏、引包咸注云、孝乎惟孝、美大孝之辭、友于兄弟、善于兄弟、是以書云爲一句、孝乎惟孝爲一句、友于兄弟爲一句、晉書夏侯湛昆弟誥、古人有言、孝乎惟孝、友于兄弟、潘岳閒居賦序、孝乎惟孝、友于兄弟、此亦拙者之爲政也、皆與包注同、今集註從尙書文、遂以孝乎二字爲孔子之言。

子游問孝章

集註、養其親而敬不至、則與養犬馬者何異、以犬馬喻親、殊屬不倫、程友菊四書辨云、犬馬喻子之不肖者、猶劉景升兒子豚犬耳之類、言犬馬之子、皆能有以養其親、但養以敬爲本、不敬、何以別於犬馬之子之養其親者乎、按此最分曉、於意理俱圓、包咸論語注有二義、一曰犬以守禦、馬以代勞、皆能養人者、但禽獸無知、不能生敬於人、一曰人之所養、乃至於犬馬、不敬、則無以別、今集註從後一說。

漢百官志、八佾舞、三百八十四人。

近本十字、下無四字。

據此是以四十八人爲列也。與杜預何休注迥異。附記於此。

問社

太平御覽引尚書逸篇云、太社惟松、東社惟柏、南社惟梓、西社惟栗、北社惟槐、可與問社章參看。

宰予晝寢

論語筆解一卷、託名昌黎、文義甚粗淺、晝寢章讀寢爲寢室之寢、畫胡卦反、言宰予繪畫寢室、故夫子歎其不可雕、不可朽、攷梁武帝解此章已是如此、不始於筆解也。

又

荀子、有子惡臥而焮掌、與宰予晝寢、可作一反對、同以聖人爲師、其勤惰相去如此。

必有忠信章

釋文、必有忠信如某者焉、引衛氏集註、於虔反、爲下句首、按衛氏名瓘、有集注六卷、今論語疏、後一說亦引之。

學易章

邢氏論語疏、此章孔子言其學易年、加我數年、方至五十、謂四十七時也、按四十七時、語特創出。

齊必變食章

古注疏、齊必變食、合下食不厭精爲一章、所謂改常饌也、與周禮齊日三舉、義亦合。

四書逸箋卷二

論語下

請車章

此章或以爲假設之辭。固非據其年。顏回少孔子三十歲。三十二而卒。則顏回卒時。孔子年六十一。伯魚五十。先孔子死。是時孔子年七十。則顏回先伯魚卒。殆十年矣。而此云鯉也死。又似伯魚先回死者。王肅家語注。此書久遠。年數錯誤。未可詳也。

長府

集註藏貨財曰府。本鄭注。邢疏云。布帛曰財。金玉曰貨。

閔子侍側章記若由也句

子路死。子哭之曰。噫。天祝予。天祝予。按祝予事。好與喪予對。他書不載。惟公羊傳及鹽鐵論註引之。

冉求聚斂

冉求聚斂。卽用田賦事。左哀十一年。季孫欲以田賦使冉有訪於夫子。子謂有周公之典在。季孫弗聽。終用田賦。冉求不能諫止。是季氏之聚斂。皆求爲之也。

鼓瑟希

集註希閒歇也。是解希字之義。何晏集解引孔注云。思所以對。故音希。是解希字之意。

與點

與點句。何晏集解引周注曰。善點獨知時。按知時。即集註樂其日用之常意。時字較該括。集解引周注。魏燉煌人。七錄云。字文逸。本姓唐。著論語義說。

顏淵問仁章記歸仁句

顏回十八。天下歸仁。見郎顛薦李固語。按孔子四十七學易。顏回十八歸仁。語皆創出。不見他書。

折獄章記無宿諾句

人知子路無宿諾。不知宰我無宿問。見墜戶錄。

襁負

包咸論語注曰。負者以器曰襁。博物志曰。襁織縷為之。廣二寸。長尺二寸。以約小兒於背。負之而行。見三國志。茂涼傳注。論語疏亦引之。少頁之而行一句。

誦詩

周禮注云。倍文曰諷。以聲節之曰誦。蓋詩有音韻可節。故云誦詩。一云誦。記也。記書能舉其詞曰成誦。古無此解。

南宮适

古者命士以上。父子皆異宮。故儀禮言。有東宮。有西宮。有南宮。有北宮。南宮居南宮。因以所居之宮為氏。

應劭謂或氏於居是也。

羿

羿有二。一帝嚳時人。見說文。一堯時人。見淮南子。邢疏。帝嚳時有羿。堯時亦有羿。則羿是善射之號。非復人之名字。鄭漁仲云。羿字從羽。從升。升卽拱字。拱羽爲羿。與伊尹之伊相類。伊從人從尹。以其人能尹正天下。伊與羿皆因其人制字也。

夫子不答

馬融注云。适意欲以禹稷比孔子。孔子謙。故不答也。謙字最平實。省許多議論。

東里

東里、鄭地名。馬融注。子產居東里。因以爲號。列子云。鄭之圃澤多賢。東里多才。是也。四書備考引東里子。及東里槐。誤。

子西

馬融注論語。子西。鄭大夫。謂子駟之子。公孫夏也。後一說云。楚令尹。

駢邑三百

集註。駢邑。地名。本孔氏論語類考云。書其邑之人名。使相駢聯。易於稽察。謂故之駢邑。非有定地也。書社三百。計七千五百家。索隱曰。古者二十五家爲里。里各立社。書社者。書其社之人名於籍。註引書社三。

百是駢邑，乃七千五百家也。

卞莊子

鄭玄論語注、卞莊子秦大夫。按鄭注、如子桑伯子、陳司敗、老彭等與諸家注異、然必有所本、存之以備一說。

石門

太平寰宇記、古魯城、凡七門、次南第二門、名石門。注云、魯城外門、蓋郭門也。卽子路宿處。

夷俟

夷、蹲踞也。本古注、四書纂箋曰、蹲、卽坐也。踞、謂箕踞。

九月在陳

荀子、孔子厄於陳、蔡居桑落之下。楊倞注、九月時也。人知孔子在陳之年、而不知爲九月、此可補書傳所未備。

東蒙

集註、東蒙、山名。邢疏云、蒙山在東、故曰東蒙。

分崩離析

孔注、有異心曰分、欲去曰崩、不可會聚曰離析。較集註、四分公室、家臣屢叛、更曉晰。

陪臣

馬融注。陪。重平聲也。邢疏。大夫已爲臣。故謂家臣爲陪。

景公千駟

晏子春秋。齊景公好馬。疑公以好馬故。致多如此。

周人葬伯夷以將軍之禮

夷齊餓於首陽。不識誰爲掩骨者。竊疑武周式閭封墓。何獨薄于二子。及讀韓非儲說云。伯夷以將軍葬於首陽山之下。然後爲千古死義者快。而歎周之厚也。

夷齊採葛

韓子通解。夷齊居首陽。採薇而食。採葛而衣。採葛事罕見引用。

邦君之妻

何晏集解。引孔注曰。當此之時。諸侯嫡妾不正。稱號不審。故孔子正言其禮也。按孔氏說。乃此章立論本旨。集註從吳氏。故不錄入。

又

王文憲曰。天地之間。男貴女賤。女子貴者。方得比於男子。故夫人自稱小童。比於小男子也。大夫之妻曰孺人。亦比小男子也。公侯之妻曰夫人。則比於男子矣。至爲天子之妻。始曰后。則在司之上。而比於繼體之君矣。

陽貨

邢疏。陽貨名虎。字貨。

涅

齊氏曰。涅。水中黑土。今江東阜泥。集註。染阜物。謂染阜之物也。

二南

逸周書云。南氏有二臣。功鈞勢敵。分爲二南之國。韓詩外傳云。其地在南郡南陽之間。據此則南本國名。厥後南氏廢。二公化行其閒。遂爲周南召南也。水經注亦引之。路史云。南仲是其後也。

稻

通志云。稻有粳糯之分。古人謂糯爲稻。本草所謂稻米者。今之糯米。按粘稻早禾。宋祥符閒始有之。

微子抱器歸周

抱器歸周二事。一太師疵。少師彊。抱樂器歸周。一微子。抱祭器歸周。集註。存宗祀。是指祭器。但云抱器。混矣。

箕子名

箕子名胥餘。見司馬彪莊子注。未審何出。

耦耕

耦耕。乃兩人並耜而耕。非牛耕也。世傳牛耕始於趙過。新定顧氏曰。古未用牛耕。易只言服牛乘馬。引重致遠。最可考者。古人於蜡祭。迎貓迎虎。凡有功於田者。無不報祭。獨不及牛。可見古未知牛耕。至漢以來。始有賣刀買犢之說。

以杖荷蓀

蓀。說文作蓀。芸田器也。集註從包氏。作竹器。字書無此解。程友菊四書辨云。以杖荷蓀四字。當各為義。以用也。謂用以行。而所荷。則蓀也。

周有八士

八士。鄭玄以為成王時人。劉向、馬融皆以為宣王時人。今集註兩存之。皆無確據。考古周書和寤解云。王注謂武王。乃厲翼於尹氏八士。惟固允讓。又武寤解云。尹氏八士。太師三公。咸作有續。神無不饗。據此。則八士乃武王時人也。按錄異傳云。周時尹氏貴族。數代不別。食食口數千。嘗遭饑。冊鏹作糜之聲。聞數十里。疑卽此尹氏。與四乳八子之說。可互證云。

民食喪祭

何晏集解。引孔氏注。重民。國之本也。重食。民之命也。重喪。所以盡哀。重祭。所以致敬。古注可取者。此類甚多。今集註概未採入。

附錄

吾豈匏瓜節

孔注云。匏瓜得繫一處者。不食故也。吾自食物。當東西南北。不得如不食之物。繫滯一處。按此謂匏瓜味苦。不爲人所食。今集註不能飲食。人則不如是。是謂匏瓜不能飲食。此等處。終覺舊注不費力。朱子不從。未審何故。

宰我問喪章

此章攷義。有謂宰我屈己以明道者。意本邢疏。正義引繆協云。爾時禮壞樂崩。三年之喪不行。宰我大懼其往。以爲聖人無微旨。以戒將來。故特假時人之謂。啓憤於夫子。義在屈己以明道也。

附記

撰論語

子夏六十四人。共撰仲尼微言。論語識

古論語

古論語二十一卷。文異者四百餘字。桓譚新論

論語策

論語。仲弓。子游。子夏。等所撰定。易。詩。書。禮。樂。春秋。策。皆二尺四寸。孝經。謙。半之。論語。八寸。策者。三分得一。

又謙焉。鄭康成聘禮疏同

論語以八寸爲尺。紀之約者。懷持之便也。以其遺非傳經文。紀識恐忘。故但以八寸。不二尺四寸也。王充論衡

論語逸篇

班固藝文志齊論二十二篇多問王知道今知道篇無考太平御覽引逸論語有問玉篇秀水朱氏疑問王即問玉然文義直淺頗類字書蓋贗託也附錄之以備考

太平御覽引逸論語問玉篇

璠璵魯之寶也孔子曰美者璠璵遠而望之煥若也近而視之瑟若也一則理勝一則孚勝

說文引逸論語

玉粲之璆兮其璪猛也

文選注引逸論語

如玉之瑩

按御覽引問玉篇云玉十謂之區治玉謂之琢亦謂之雕又璆玉色鮮白也瑩玉色也瑊玉光也璵赤玉也璠璵璠美玉也璵三采玉也玲瓏璵璵玉聲也璵充耳也璵玉飾以水藻也此皆直似爾雅並記於此按御覽引古書傳多後人竄入者不獨此篇為然

論語逸句

大夫退死葬以士禮王制正義

白虎通引論語朋友無所歸三句已見第一卷

四書逸箋卷三

大學

盤

韋昭注、盤、承盥器。集註作沐浴之盤。沿孔疏也。新定邵氏作盥類之盤與章注同。

邦畿千里

王制、四海之內九州。州方千里而畿居其一。考漢書地理志及孔疏、西周畿內止八百里。東周畿內止六百里。言千里舉成數也。韋昭曰、通二封之地共千里也。宗周得百里者六十四。成周得百里者三十六。共得百里者方千里。班氏云、東西長而南北短。短長相覆為千里。

緡蠻邱隅

集註、邱隅、岑蔚之處。本鄭氏注、烏擇岑蔚安閒而止處之。孔氏正義、岑巖險蔚、謂草木翁蔚。按邱隅無草木翁蔚意。此等處無關義要。第存之可也。

淇澳

澳亦水名。見博物志。漢武帝塞澳河是也。

淇竹

竹譜云、淇地殷紂竹箭園也。

藁竹

孔穎達疏、藁、王莠也。

本爾雅

竹、籊竹也。郭璞云、藁、蔚也。陸璣草木疏、亦分藁與竹爲二。今集註藁作綠、與古

疏異。

絜矩

矩爲方之器。絜、今木工墨線。二字皆借義。朱子或問、引莊子絜之百圍、賈子度長絜大、是絜爲借義之證。

楚書

鄭氏注、楚書、楚昭王時書也。

聚斂盜臣

鄭氏注、國家利義不利財。盜臣損財。聚斂之臣乃損義。按損義已該得集註傷民之力意。

中庸

性情

孔疏引賀瑒云、性之與情、猶波之與水。靜時則水、動則是波。靜時是性、動則是情。今人祇知爲宋儒語、而不知出自賀氏、特爲指出。

攬

孔疏、攬、柞、柞也。字書、柞、穿也。柞、堅忍之木。蓋以柞爲穿、取其堅也。今集註、改作機檻、未審所本。

柯 周禮柯長三尺博三寸是柯之則也。

正鵠

正鵠皆鳥名。鵠小而飛疾。大射禮鄭注、正齊魯之間。謂之題肩。皆鳥之捷黠者。射之難中。故取以爲的。

帑

帑尚書傳。毛詩箋。並云子也。杜預注左傳云。妻子也。中庸鄭氏注。帑子孫也。孔疏古者謂子孫爲帑。今集註從鄭氏。按帑本借字。左傳以害鳥帑。注鳥尾爲帑。蓋帑爲鳥後子孫爲人後。義相通也。

宗器

宗器鄭氏注。祭器也。集註改重器。

燕毛

周禮司儀職曰。王燕則諸侯毛。鄭司農注。毛老也。謂老者在上也。老者二毛。故謂之毛。鄭氏中庸注。燕以髮色爲坐。祭時尊尊也。至燕親親也。今集註從鄭氏。以毛爲毛髮。仍是老者在上也。太原閻氏據周禮。駁集註未當。

方策

春秋傳序。大事書於策。小事簡牘而已。正義云。簡容一行。字數行。書於方。方所不容。書於策。蓋古未有紙。

削竹爲簡，長二尺，短者半之。字少者書於簡，稍多則書於大版，又多則以韋編聯諸簡，謂之策，而書之。今集註訓策爲簡，從古注也。

蒲盧

大戴禮十月雉入淮爲蜃。傳云蜃者蒲盧也。鄭中庸注蒲盧螺贏。詩曰螟蛉有子，螺贏負之。螟蛉，桑蟲也。言政之於百姓猶蒲盧之於桑蟲。按二說皆與敏樹意不相屬。朱子或問辨之，從沈括以蒲盧爲蒲葦。於經文不易字，而文義貫通。集註勝古注，多類此。

華嶽

華山名嶽，亦山名。周禮豫州山鎮曰華，雍州山鎮曰嶽。爾雅釋山云：河南曰華，河西曰嶽。舉二山與下水對。今解華嶽爲西嶽誤。

卷石

鄭氏注卷猶區也。集註從之。字書區，藏物處。又小室曰區。漢書賈區注：若今小菴室之類。故凡物小者曰區。區按區處也。一拳石猶言一處之石耳。

軌

兩轍之間爲軌。軌廣六尺六寸。見孝經注。

文書名

書名、書之字也。見鄭氏周禮論書名注。又外史掌達書名於四方。疏云正其字使四方讀而知之。古者謂字爲名。儀禮百名以上書之策是也。又古者謂一字爲一文。許氏說文卽說字書同文則書同字也。

綱

沈括云綱與縵同。是用縵麻織疏布爲之。

附錄

齊其家節

辟、集註讀爲僻。禮記疏、辟、音譬。猶喻也。謂於親愛賤惡等皆以心度之。而反以喻己。則身修與否。可自知也。其說自通。但與下好而知其惡三句。文義不屬。依集註則字順意從矣。凡朱子易古註處。務使通章氣脈貫通。此其一端。

反古之道

鄭氏注反古之道。謂曉一孔之人。不知今王之新政可從。按曉一孔語。僅見此。

附記

鄭氏大學中庸目錄

大學在戴記之第四十二。中庸在戴記之第三十一。於鄭氏目錄中皆屬別錄。孔疏謂於別錄屬通論。蓋當時以二書非經之正文。故云別錄。以不爲專言學之書。故云通論。自宋仁宗天聖中以大學賜新第王

拱辰以中庸賜新第王堯臣等。世始知尊信二書。及朱子章句出。而孔門心法乃較著於世。凡摭拾小故。議朱子者。皆妄也。

古本大學

古本大學。自經一章外。首誠其意。終平天下。孔氏正義謂此篇論學成之事。能治其國章。明其德於天下。從誠意爲始。其閒節次稍有不相承者。蓋古人文法疏辭或不屬。而意實可通。要於立言之指無害。雖由之不易可也。

石經大學

石經大學。節次不及古本爲按之有序。中間竄入顏淵問仁。至非禮勿動二十二字。尤不相附屬。疑好事者爲之。

二程大學定本

明道先生定本。移欲明明德節於邦畿三節之下。次淇澳聽訟節於平天下章第四節之後。殷未喪師節之前。頗與諸本異。今本章句。蓋伊川先生所序次。而彙爲經一章。傳十章。則朱子所定也。古人爲學次第。具見於此。論者謂格致章未嘗亡。紛紛之議。至今未息。殆所謂文人好相詆者耶。

四書逸箋卷四

孟子上

麋鹿

麋澤獸陰。鹿山獸陽。集註作大小解。未知所本。

靈臺

五經異義。天子有三臺。靈臺以觀天文。時臺以觀四時施化。囿臺以觀鳥獸魚鼈。諸侯卑不得觀天文。無靈臺。但有時臺。囿臺管子云。武王有靈臺之復。而賢者進也。文王服事。何得僭天子制。或孟子託以諷梁也。

填

趙岐孟子注。填鼓音也。集註從之。宋孫奭疏云。填塞也。又滿也。言鼓音之充塞洋洋而盈滿也。

五畝之宅

趙氏曰。古二畝半。當今一畝十步。則五畝止。當今二畝二十步。尉繚子曰。天子宅千畝。諸侯百畝。大夫以下里舍九畝。則民宅五畝。僅得大夫士之半也。周制以漸而降。蓋如此。

頽白不負戴

趙注壯者代老心各安之一安字最形容得王民嗁嗁氣象出按前漢地理志云周公封魯瀕洙泗之水其民涉渡少者扶老而代其任俗既益薄
長老不自安與幼少相讓至斷斷如可與趙注參看

餓莩

趙注莩零落也言餓死者零落於道路也廣韻殍注草木枯落也

作俑

孔子惡俑者象人而用謂其殆於用人也用人殉葬始宋文公見春秋成二年傳至秦武公死殉者六十六人繆公之葬殉者一百七十七人三良在其中見史記其流毒至此故惡其不仁且謂其無後

易耨

趙注易耨芸苗令簡易也閻百詩云即立苗欲疏忽

孟子見梁襄王章

通鑑慎觀王二年壬寅惠王卒孟子去魏適齊是一見襄王後即去也故有不似人君之言蓋君子居是邦不非其大夫使仍在梁必無議襄王語

釁鐘

釁祭名集註失訓鄭司農周禮注云血祭曰釁趙注新鑄鐘殺牲以血塗其釁鄰因以祭之曰釁術

說文術邑中之道徐楚金說文通釋云術方術也謂一方之道纂箋云此爲得制字之本意

寡妻

趙注寡少也嫡妻惟一故曰寡

鼓樂

趙注鼓樂者樂以鼓爲節也

文王之囿

後漢楊賜傳樂松曰文王之囿百里人以爲小齊宣囿五里人以爲大此與孟子異或別有所本

郊關

四郊皆有關鄭氏注關境上門也

入國問禁

禮入國問俗入境問禁集註云禮入國而問禁疑國字是境字之誤

轉附朝儻

集註云轉附朝儻皆山名金仁山云海旁之山潮至如儻儻與舞通故名孟子雜記云朝如朝夕之朝衛有朝

歌齊有朝儻皆以俗好嬉游故名其地按轉附必海旁之山言其宛轉景公傳云轉附乃太附於海也

之墓二公皆齊之先王欲觀已隱有法二公意

鰥寡孤獨

禮記集說中山成氏曰。孟子。王制。禮運。所言鰥寡孤獨。此通言耳。四十無妻不爲鰥。三十無夫不爲寡。有室無父不爲孤。壯而無子不爲獨。按四者。鰥與獨一類。孤與寡一類。鰥本魚名。獨本獸名。鰥性單獨。性特。皆借義。凡無夫曰寡。此云老。所謂五十無夫曰寡也。大戴禮長無父亦曰孤。此云幼。所謂子不見父則呱呱啼也。蓋舉其最無告者言之。

囊橐

孫奭孟子疏。小曰橐。大曰囊。與今集註異。

爰方啓行毛注

孟子正義引毛注云。公劉張其弓矢。乘其干戈。戚揚以方。開道路去之。蓋諸侯之從者。十有八國焉。十有八國未詳。

太王屬耆老

鄭漁仲通志。獯鬻來攻。古公事之以皮幣犬馬珠玉菽粟貨財。皆不得免。復欲其土地與民。古公曰。與之耆老曰。君不爲社稷乎。曰。社稷所以爲民也。不可以所爲亡民也。耆老曰。君不爲宗廟乎。曰。宗廟吾私也。不可以私害民也。按爲社稷爲宗廟。卽下節世守勿去意。

從之者如歸市

通志古公率其私屬去豳舉國扶老攜幼從之者二千乘一止而成三千戶之邑。按諸侯從者十八國舉國從者二千乘皆與如

見引用

雙人
杜預曰賤而得幸曰嬖。

三鼎五鼎

張晏五鼎注牛羊豕魚麋也。雙峯饒氏謂五鼎爲羊豕魚腊膚三鼎爲魚豕腊並誤。按儀禮鼎數圖一鼎特豚無配三鼎特豚而以魚腊配之五鼎皆用羊豕而魚腊配之蓋禮以鼎之三五爲隆殺不以實鼎之物計三五也。饒氏蓋不知魚腊爲配鼎而誤。張晏注牛麋尤非大夫所用。

公孫丑

公孫丑有政事之才見趙岐公孫丑章句注。

置郵

馬遞曰置步遞曰郵。今集註驛與駟音義同皆傳遞馬。楊升菴云置緩郵速驛遲駟疾不知何據。

微仲

微仲乃微子之次子名衍卽後國於宋者見孔安國傳。

比干

孟子雜記王子于封於比故曰比干。

孟賁

許慎淮南子注孟賁衛人也通攷云齊之力士當以許注爲正通鑑秦武王時力士任鄙烏獲孟說皆至大官說卽賁也

麒麟

麒麟二獸名郭璞云麒麟似麟無角詩疏麟黃色一角角端有肉作一獸誤。

廩

趙注廩市宅也集註本之說文市物邸舍曰廩鄭氏王制注本之據說文廩爲貯貨之所乃市宅之取利者因其利而賦之亦抑末之意但賦其廩則市宅有不賦者矣。

夫里之布

趙氏注里居也布錢也夫一夫也鄭司農周禮注云里布者布參印書廣二寸長二尺以爲幣貿易也詩云抱布貿絲此布也孫奭云不知言布參印書者何見或舊時說也。

耕稼陶漁節

舜耕於歷山陶於河濱漁於雷澤人習知之按路史舜牧羊於潢陽灰於常羊作什器於壽邱就時於負夏販於頓邱債於傅虛未嘗暫息此數事可補耕稼節之遺。

東郭氏

齊大夫有東郭氏。名偃。名書。名賈者。見於春秋。亦有北郭氏。南郭氏。皆齊大夫。古疏云。齊之東地。號曰東郭。云氏者。未詳其人。以理推之。孟子之所弔。必賢大夫也。通志東郭氏姜姓。齊公族。桓公之後也。

孟仲子

孟仲子名罊。孟子之子。見譜。

景丑氏

前漢書藝文志載景子三篇。列儒家者流。注云。說宓子語。似其弟子。按孟子稱景丑為景子。其言父子主恩。君臣主敬。本儒家言。疑即漢志所載景子。又兵家有景子十三篇。

兼金一百

古者以一鎰為一金。趙氏注故兼金一百。不言鎰。以一百金。即一百鎰也。

在薛節

人知孔子絕糧於陳蔡。不知孟子絕糧於鄒薛。風俗通窮通篇云。孟子絕糧於鄒薛。困殆甚。退與萬章之徒。序詩書仲尼之意。作書中外十一篇。疑絕糧於薛。即此在薛時。曰聞戒。曰兵饋。與陳蔡之阨。固不殊也。

持戟失伍註

去之謂殺之。本古注。金氏曰。持戟不過庭前階下。執戟之人。庶人之在官者。去之。止是廢棄之。

蜺蠹諫王節

趙注三諫不用致仕而去。按蜺醜三諫未詳。或大概言之也。

王驪攝卿

孔穎達曰。春秋有使大夫攝卿之法。如文七年傳。晉使先蔑如秦。逆公子雍。荀林父謂蔑曰。攝卿以往可也。何必子集。註王驪攝卿以行。蓋本諸此。

反齊止羸

反齊止羸。解者謂餘哀未忘。固屬臆說。近太原閻氏引列女傳。以爲孟子仕齊。歸葬於魯。三年免喪。然後復至齊。據此則止羸句爲贅設。充虞之問。不應在三年後。且三年前亦不得云前日也。四書辨云。孟母葬魯之時。治喪之具。皆齊所賜。反齊止羸。乃向國爲壇。望謝齊君之禮。禮畢仍反於魯。以終三年之喪。魯平公與宣王會於臯繹。樂正子備道孟子之賢。正此時也。

中古棺七寸

中古注周公制禮時。攷周制棺。皆不云七寸。元詹氏曰。記檀弓。夫子制於中都。四寸之棺。五寸之槨。而喪大記云。君之棺八寸。上大夫棺七寸。下大夫棺六寸。士棺五寸。注云。皆周制。舍此未見有七寸之文。孟子或別有本。

勸齊伐燕

史記燕王屬國於子之。三年國大亂。孟軻謂齊王曰。今伐燕。此文武之時。不可失也。齊王因令章子將五

都之兵以伐燕。此與孟子文迥異。蓋因有勸齊伐燕語。遂附會其說。遷史不足據如此。

季孫子叔疑

集註、季孫子叔疑。不知何時人。趙注、二子。孟子弟子也。閻百詩云。子叔。魯文公之族。又趙注。子叔心疑惑之。則疑字非人名。

龍斷

趙注、龍斷謂塚斷而高者也。今集註祇以岡壟易塚字。秀水朱氏經義考。謂龍斷義。趙注未詳。今集註本陸氏善經。未細檢趙注耳。

滕文公 滕定公

滕文公定公。朱子失注。趙氏云。古本世紀錄諸侯之世。滕國有考公麋。與文公之父定公相直。其子元公宏。與文公相直。似後世避諱。改考公爲定公。以元公行文德。故謂之文公也。

乘屋

乘屋。趙氏謂乘蓋其野外之屋最當。蓋爲田事計。宜豫完其田之宅。若邑居之屋。已入而處之矣。

井田

集註、井地。卽井田也。趙氏順孫纂疏曰。言其始以地而畫井耳。井田則因其田旣已成而言之也。此最分曉。下文從經界說起。正是答他地字。由經界說到分田。語固有漸次在。

滕壤地田數

仁山金氏曰。滕截長補短。將五十里。則是除山川林麓之類。以田計也。以開方法計之。則五十里爲田。一千五百井。二萬二千五百夫。

徙字註

集註。徙。謂徙其居也。趙注。徙。謂受田易居也。著受田二字好。蓋井田之法。不受田則不易。無輕徙者。

大略

集註未訓略字。趙注。略。要也。言井田未及其詳。已舉其要。大要者。大事之要也。潤澤其餘事耳。

衣褐

趙注。褐。以毳織之。若今馬衣也。馬衣字新甚。不經見。

稼穡

說文。種曰稼。斂曰穡。按稼。卽下樹藝。穡。卽下五穀熟。蒔厥豐草。種之黃茂。教稼之法也。后稷之穡。有相之道。教穡之法也。二字各爲義。

記墨者弟子

墨者弟子。不獨夷之。雜檢書傳。得十數人。附記於此。隨巢子。胡非子。馬總意林載二子各箸書一卷相里氏。里一作文相夫氏。鄧林氏。後三子分爲三家田鳩。禽滑釐。高何。懸子石。謝子。關東人唐姑果。秦人公上過。鉅子。孟

勝。按孟子謂楊墨之言盈天下。楊子不數傳而微。墨氏至與孔子並稱蓋衛之者衆也。宜其惑人也。易而流毒也遠。

詭遇

橫而射之曰詭遇。

淫移屈

富貴不能淫三句。趙注。淫亂其心也。移易其行也。屈挫其志也。今集註易亂爲蕩。緣亂字太重。易行爲節。緣行字太寬。朱子四書字字不苟如此。

與葛爲鄰

地理志云。葛今梁國寧陵有葛鄉。史記注毫都亦在梁國。故曰與葛爲鄰。

戴不勝

楊倞荀子注。戴不勝卽戴驩也。爲宋太宰。

莊嶽

莊嶽兩地。皆齊街里名。閻百詩引左傳云。襄二十八年。得慶氏之木百車於莊。昭十年。又敗諸莊。哀六年。戰於莊。卽此莊也。襄二十八年。慶封反陳於嶽。卽此嶽也。按閻百詩四書釋地。最爲該博。茲不敢多採者。爲信故。甯闕。

段干木

段干姓。木名。姓源老聃子。名宗。字尊祖。爲衛將軍。封於段。又封於干。因以爲姓。風俗通。段干木注云。姓段。名干木。魏都賦。干木之德。唐書百官表。又云。姓段。爲干木大夫。俱誤。

今茲

茲年也。今茲猶今年也。

營窟

營窟二字。各一義。營者。營累其土於地上。窟者。窟穴於地中。見禮運注。

墨翟姓名

墨子姓翟。母夢烏而生。因名烏。以墨爲道。墨非姓。

陳仲子

陳仲子名仲。字子終。見皇甫謐高士傳。

於陵

集註。於陵地名。無確訓。陳心叔曰。於陵楚地。蓋避地於楚也。

四書逸箋卷五

孟子下

兩離婁

名疑云。兩離婁。一黃帝時人。一般人。孟子離婁之明。據莊子所云索元珠者。黃帝時人也。

泄泄沓沓

泄泄集註。訓怠緩悅從。字書無此解。六書正譌云。泄。水名。借爲舒散之意。按下沓字亦從水。水性濡而善下。濡故怠緩。善下故悅從。泄泄沓沓有隨波逐流意。字書泄泄訓多人。沓沓訓猥賤。皆非詩義。

女吳二事

吳越春秋。齊女質吳。吳爲太子聘之。解者謂孟子所云。卽此。按春秋襄二十四年傳。晉平公嫁女於吳。齊侯以女爲媵。此又一事。爲媵則更可恥矣。

滄浪

集註。滄浪。水名。宋葉夢得曰。非水之正名。而因以爲名。則以水別之。若滄浪之水是也。蓋滄浪本地名。因水流經此。故名滄浪之水。水經注。武當縣西北四十里有洲曰滄浪洲。水曰滄浪水。

壙

集註、壙、廣野也。本趙注、獸樂廣野。吳氏程曰、壙、穴也。獸之所居。

七年之內

趙注、天以七紀。故云七年。昭十年左傳云、天以七紀。杜注、二十八宿。四七是其旨也。

瞽瞍

路史、瞽瞍、天瞽。孔安國尚書大傳云、無目曰瞽。舜父有目不能分別好惡。故時人謂之瞽。配字曰瞍。路史注云、瞽瞍兩目不見。史云盲者子是也。二孔以為有目不能分別善惡者妄。按瞽瞍稱頑父。左傳云、心不則德義之經為頑。愚謂目不辨善惡。心不則德義。皆因反常而加以惡名。孔說似長。

舜生諸馮章

梁蕭綺拾遺錄、引孟子逸句云、千里一聖。謂之連步。即此章地之相去意。鮑昭河清頌、引孟子逸句云、千載一聖。猶旦暮也。即此章世之相後意。二書皆撮此章大意為言也。

負夏之負訓海

負夏、趙注、負海也。負訓海、僅見此。疏亦未及。

疾作註

趙注、疾謂瘡疾。疏亦曰、今日我瘡疾發作。疾直指瘡疾亦可。

西子遺事

孟子疏引史記云、西施、越之美女。每入市。人願見者。先輸金錢一文。此事他書不載。

帝使九男

帝使九男事舜。或疑丹朱胤子。安得離國。按世紀云。堯有十子。娶散宜之女曰女皇。生丹朱。又有庶子九人。是事舜之九男。皆庶子也。趙注云。九子事舜以為師。

舜弟妻兄妹

舜有弟象。娶堯二女。娥皇、女英。世所習聞。陳心叔引大戴禮帝繫篇云。帝娶帝堯之子。謂之女媯。注者以娥皇女英女媯為三妃。漢地理志云。陳倉有舜妻育冢祠。則舜有四妻矣。山海經云。舜娶葵一作登。比氏。生宵明燭光。則舜又有一妻矣。列子云。舜弟妹之所不親也。父母之所不安也。綱目注云。舜妹名戡首。列女傳云。瞽瞍欲殺舜。女弟繫憐之。則舜有二妹矣。越絕書云。舜父頑。母嚚。兄狂。弟傲。尸子云。舜事親養兄。為天下法。則舜又有兄矣。事或出於附會。然人知舜有弟而不知有兄妹。知有妻娥皇女英。而不知有女媯。育葵比氏。附紀於此。以資博覽。

南河之南

趙注。南河之南。遠地南夷也。故言然後之中國。按南夷與中國對。上下文義貫通。此古注之最用意者。劉云。南河之南。九河之最南者。按九河皆在北。不得云南河。當以冀州最南者為是。其地殆不可考。

舜居堯喪

後漢書李固傳。昔堯殂之後。舜仰慕三年。坐則見堯於牆。食則見堯於羹。此舜居堯喪之實事。今文家用

見夔見牆事。泛作景慕語。非。

舜之子

舜之子九人。不獨商均。皇甫謐云。娥皇無子。商均。女英生也。次子季釐。封於緡。後爲桀所滅。

屈產

屈產。泉名。馬飲此泉者良。見寰宇記。

去其籍

周禮司徒之職。闕司祿一官。三禮辨云。孟子謂爵祿之制。諸侯惡其害己。而去其籍。此其證也。

大國井田之數

漢志開方法。大國地方百里。爲方十里者百。提封萬井。爲田當九百萬畝。除山林、陵麓、溝洫、城郭、宮室、塗邑。三分去一。計田三百萬畝外。實有井六千六百六十六井。井之三之二。計得田六百萬畝整。

次國井田之數

次國地方七十里。以開方法計之。爲方十里者四十有九。爲方一里者四千九百。爲田四百四十一萬畝。三分去一。除田一百四十七萬畝外。實有井三千二百六十六井。井之三之二。爲田計二百九十四萬畝。

小國井田之數

小國地方五十里。以開方法計之。爲方十里者二十有五。爲方一里者二千五百。爲田二百二十五萬畝。

三分去一。除田七十五萬畝外。實有井一千六百六十六井。井之三之二爲田。計一百五十萬畝。

附庸

鄭氏注。小城曰附庸。纂箋引項氏云。王莽封諸侯。置附城。則漢人蓋以城解庸也。庸卽墉古文。不成國。謂之附城。猶今言支郡爲屬城也。春秋繁露云。附庸。字者方三十里。名者方二十里。氏者方十五里。

館甥貳室

世紀。堯見舜。處之貳室。賜之絺衣與琴。爲築宮室。封之虞土。

擊柝註譌

趙注。柝。行夜所擊木也。行夜。猶今之巡夜。周禮司寤氏。掌以星分夜。以詔夜士。鄭注云。主行夜徼候者。今集註譌作夜行。只倒一字。便說不去。

臺無餽

左昭七年傳。王臣公。公臣大夫。大夫臣士。士臣阜。阜臣輿。輿臣隸。隸臣僚。僚臣僕。僕臣臺。人有十等。臺爲最下。云臺無餽。以明繆公當愧悟之後。不特使之尊者不以相擾。卽最下如臺。亦不復致餽。然後賢者得以脫然自處。斯其爲優賢之至。而改悔之深也。

市井之臣二句本儀禮

儀禮。凡稱於君宅者。在邦則曰市井之臣。在野則曰草莽之臣。庶人則曰刺草之臣。孟子語本此。少庶人

一句。

市井

市井說不一。按古者因井爲市。故曰市井。無他義也。

告子

告子姓告。名不害。兼治儒墨之道。嘗學於孟子。見趙岐告子章句注。

湍水

趙注、湍水圓也。謂湍縈水也。孫氏疏曰、縈洄之水。陸氏善經注云、湍、波流也。集註蓋兼從之。

白羽之白四句

馬總意林引孟子云、白羽白性輕、白雪白性消、白玉白性貞、雖俱白、其性不同也。按此乃趙氏孟子注文。止易性堅爲性貞。經義考探入孟子逸句中。失檢。

易牙名

易牙名巫牙其字也。見孔穎達左傳疏。

孫氏疏引奕秋語

孫奭孟子疏引傳記云、奕秋、通國之善奕也。有歌者止而聽之。則奕敗。笙汨之也。隸首、天下之善算也。有鴻鵠過、彎弓問以三五則不知。鴻鵠亂之也。孫氏以爲亦孟子之言。按二事見子華子。意與此略同。而文

氣散緩。不類此所引。疑別有所謂傳記。

韓詩外傳引放心章

韓詩外傳引孟子放心章。有其於心爲不若鷄犬哉。不知類之甚矣。悲夫。終亦必亡而已矣。數句。在有放心而不知求下。學問之道無他上。

趙孟

左傳晉未可媮。有趙孟以爲大夫云云。晉趙氏世呼趙孟。猶智氏呼智伯云爾。張存中四書通證云。趙孟乃襄子至烈侯之通稱。

膏梁

趙注。膏梁。細梁如膏者也。孫氏疏引禮云。公食大夫。稻梁爲嘉膳。則膏梁味之至珍者也。按如膏之梁。有文之繡。令善之聞。廣遠之譽。每兩字皆一虛一實。自爲對仗。今集註。膏訓肥肉。則兩字皆實。與文繡字。不相屬對矣。

曹交

王氏應麟曰。曹交。趙氏注云。曹君之弟。按左傳哀公八年。宋滅曹。至孟子時。曹亡久矣。曹交。蓋以國爲氏者。

磯

說文。磯。石激水也。廣韻云。大石激水。孫奭孟子疏云。譬如石之激水。順其流而激之。正韻引孟子是不可

礮亦云石激水曰礮。今集註訓水激石與諸書異。

杞梁之妻

孟子杞梁之妻即孟姜也。

束牲載書

集註葵邱之會陳牲而不殺。置書加於牲上。乃穀梁傳之文。太原閻氏據左傳士莊子為載書。周禮司盟掌盟載之法。指駁集註。殆未檢梁穀也。

南陽

趙注山南曰陽。岱山之南謂之南陽。疏云岱山即太山。在齊之南。四書備考引南陽府之南陽縣誤。

滑釐

滑釐姓禽。墨子弟子慎子師也。慎子名到。集註滑釐慎子名。蓋承趙注而誤。按慎子云滑釐不識者言不識也。蓋甚不解之辭。古疏引史記墨子云公輸子意欲殺臣。殺臣宋莫能守。可攻也。然臣之弟子滑釐等三百人皆已持守國之器。在宋城上而待楚寇也。是滑釐蓋善用兵者。故慎子特舉以對。

白圭治水

韓非子曰白圭之行隄也塞其穴。此以鄰為壑之證。

饑餓

饑餓泛訓饑非。蓋饑而至餓。故不能出門戶。韓子云家有常業。雖饑不餓。淮南子云甯一日饑。毋一旬餓。

以二說推之。餓甚於饑。黃公說字云。饑猶可生。餓則至死。故言餓殍。不言饑殍。

疇古注

趙注。疇。一井也。疏云。不知一井何據。今集註。疇。耕治之田。本說文。又蔡邕麻田爲疇。見前漢天文志注。

范

趙注。范。齊邑。王庶子所封食也。蓋王子食邑在范。故自范望見王子。今集註刪王庶子句。

革車虎賁

孔安國注。革車。百夫長所載車。虎賁。百夫長也。

盆成括

趙注。盆成括。嘗欲學於孟子。問道未達而去。後仕於齊。晏子春秋云。盆成括。父之孝子。兄之順弟也。

記曾子不忍食羊棗

人知曾子孝於父。不忍食羊棗。不知曾子孝於母。不忍食生魚。孝子傳云。曾參食生魚甚美。因吐之。人問其故。參曰。母在之日。不知生魚味。今我食美。故吐之。遂終身不食生魚。

記近聖人之居二句

左哀七年傳。公伐邾。及范門。猶聞鐘聲。又云。魯擊柝。聞於邾。故曰近聖人之居。若此其甚也。按鄒本邾子之國。

附錄

黎民

四書辨疑云。黎本訓衆。又訓黑。所用各不同。詩書稱黎民者。先儒皆解爲衆民。近世始有黑髮黔首之說。按黎民與黔首不同。黔有首字相配。語意自圓。黎民中閒本無髮字。訓黎爲黑。是爲黑民。文公詩傳。東萊讀詩記。解民靡有黎。亦皆訓黑。是民靡有黑。不知黑爲何物也。此黎字仍當訓衆。蓋言五十七者。衣帛食肉。其餘衆民。亦不饑不寒。不必解黑髮與頰白對也。

折枝

折枝。陸氏善經謂折草樹枝。集註從之。與爲長者意殊不屬。趙氏注。按摩折手。節解罷枝也。亦費力。陸筠云。枝肢古通用。謂罄折腰肢揖也。

符節

周禮符節注。如今宮中諸官詔符也。漢制以竹爲之。長六寸。分而相合。師古注。亦云取象竹節。今集註云。以玉爲之。篆刻文字。按諸家訓符節。皆不云玉。且符節門關所用。給付不常。篆刻文字。恐不能畫一。周禮璽節注云。今之印章也。璽字從玉。以玉爲印章。故可篆刻文字。符字從竹。不應反用玉。語錄引牙璋起軍旅。爲用玉之證。按符節非軍旅所用。似不可據以爲例。

君子之澤章

澤注云。流風餘韻。按君子之流風餘韻。雖百世可也。五世安得遂斬。新鄭高氏曰。澤謂容貌色澤。猶禮云。手澤口澤也。蓋五世之內。其人雖不可見。見其人者。猶有存焉。其形容音響。尙有稱述之者。至於五世。見其人者。亦皆已歿。而形容音響不復可知矣。故澤皆五世而斬。

稅冕

程友菊四書辨云。稅字。集註音脫。冕何等物。而可作常冠戴之以行。按稅。仍當是輸芮切。收也。斂也。謂甫脫去冕。不暇收拾。即便行也。

邱民

趙注。邱。十六井也。邱民。謂邱甸之民。得乎邱甸之民。便可爲天子。猶有田一成。有衆一旅之意。

追蠡

趙希鵠曰。追。琢也。今畫家滴新粉隆起處。猶謂之追粉。蠡。剝蝕也。追蠡。言禹之鐘。款文追起處剝蝕也。又筆乘云。蠡。音禮。說文云。蟲之木中。追當爲追擊之追。蓋高子以禹樂用之者多。故凡追擊之處。摧殘如蠡齧木之形也。趙氏釋追云。鐘紐。釋蠡云。欲絕之貌。與豐氏說略同。但少周禮所謂旋蟲二句。故集註用豐氏說。按追蠡細故。無關義要。諸說互異。若此。蓋古人之言。初無定實。解者亦無定詰。得其意而通之。皆可以從容玩索。而有得焉。故凡於義未害。可備一說者。不妨兼收。要在決擇不苟耳。

既入其苙

宋王勉夫云。苙。香草白芷之類。豚之所甘。既放之得所。又從而招之。非善治邪說者也。如此則苙字。招字。

皆從本義本音。而與說書之旨。正自相通。按隋志云。趙岐注孟子十四卷。又有鄭亢注孟子七卷。蔡母籛爽云。至於皇朝崇文總目。孟子獨存趙岐注十四卷。唐陸善經注七卷。故朱子集注。率參用三家本之。趙氏者尤多。聞有趙注可探而集註失引者。略為表出。蓋補遺之意。非敢謬于朱子也。

附記

孟子逸篇

性善。辨文。說孝經。為政。

王充曰。孟子作性善之篇。及其不善。物亂之也。趙岐曰。孟子外書四篇。其文不能宏深。不與內篇相似。非孟子本真。後世依放而託之者也。

孟子逸句

按朱氏經義考。所採孟子逸句。文義多與內篇相似。疑引書者增損其辭而為之。其與內篇文異者。則又趙岐所云。文不宏深。非其本真者也。今就朱書所引。復加擇別。附記於後。以備參考。

孟子三見齊王。而不言事。門人曰。曷為三遇齊王。而不言事。孟子曰。我先攻其邪心。荀子。

人之學也。其性善。荀子。

吞舟之魚。不居潛澤。度量之士。不居污世。夫藝冬至必彫。吾其時矣。韓詩外傳。經義考分。夫藝三句為一則誤。

高子問於孟子曰。夫嫁娶者。非己所自親也。衛女何以得編於詩也。孟子曰。有衛女之志。則可。無衛女之志。則寡。夫道二。常之謂經。變之謂權。權懷其常道。而挾其變。權乃得為賢。夫衛女行中孝。慮中聖。權如之。

何韓詩外傳

孟子曰。夫雷電之起也。破竹折木。震驚天下。而不能使聾者卒有聞。日月之明。徧照天下。而不能使盲者

卒有見。韓詩外傳

孟子曰。夫有意而不至者有矣。未有無意而至者也。法言

孟子曰。人皆知以食愈饑。莫知以學愈愚。人皆知糞其田。而莫知糞其心。糞田莫過利。苗得粟。糞心易行

而得其所欲。說苑

孟子曰。紂貴為天子。死曾不如匹夫。漢書伍被傳

孟子曰。堯舜之道不遠也。人不之思耳。鹽鐵論

正枉者。必過其直。黨錮傳。昌言。作矯枉過直。

堯舜不勝其美。桀紂不勝其惡。風俗通

孟子曰。今人之於爵祿。得之若其生。失之若其死。梁書處士傳

戰者危事也。北堂書鈔

孟子曰。人之所知。未若人之所不知。廣宏明集

君子稱身而正位。不為苟得受賞。列女傳

孟子曰。江海異於行潦者。深廣也。泰山別於邱陵者。高大也。若深不異於行潦。則孺子浴其淵。高不出於

邱陵則跛羊陟其巔。韓詩外傳

或問爲學之道。孟子曰：靜然後慮，使良心不汨於欲；頌然後會，使良知不誘於物。此學之道也。韓詩外傳上三則

經義考失引

按經義考所引孟子逸句，如鹽鐵論蠶麻以時，布帛不可勝衣也，周官大行人注，諸侯有王坊，記注，舜年五十而不失其孺子之心，史記注，禹生石紐，西夷人也，張衡傳注，阿諛事貴，脅肩所專，俗之情也，意林所引，虐政殺人，何異刀耶？七則，皆與今孟子文略同，蓋引書者增損其辭爲之，他如文選注，泰山之高，參天入雲，廣韻注，六十四黍爲一圭，十圭爲一合，顏氏家訓，圖影失形之類，語皆直淺，不似內篇，凡朱書失引，散見他書者，概不敢攔入。

四書逸箋卷六

四書人物遺事已見人物考聚考諸書者不錄。緯書小說怪誕之言不錄。

孔子此下至孟子凡二十三則記孔孟及諸賢遺事。

孔子脩春秋九月而成路史注。

孔子治春秋退脩殷之故歷使其數可傳於後晉書律志。

孔子登泰山見七十二家字皆不同宋景文筆記。

孔子求古史得黃帝元孫帝魁氏之書帝魁紀。

顏回

顏回明仁於度穀後漢書。

顏回縮屋明貞北齊書廢帝紀。

顏回不以夜浴改容劉子謹獨編。

顏回十八天下歸仁郎顛薦李固語。

曾子

曾子見益母而感陸璣疏。

曾參行孝。枯井湧泉。孝子傳

吳起學於曾子。居頃之。其母死。起終不歸。曾子薄之。而與起絕。天中記

曾子攀柩車引輜。為之上也。淮南子

曾子架羊。淮南子舜殺弟。周公殺兄。猶之為仁也。文公樹米。為義也。樹米架羊。事不見他書。

曾子倚山而吟。山鳥下翔。鹽鐵論

曾子居曲阜。鷓鴣不入城郭。水經注

曾子鋤瓜。三足鳥來萃其冠。古今注

子路

子路見夏南。憤恚而怵慄。晉書夏統傳

崩贖之亂。衛人狐鸞殺子路。子路之子子崔。行往復仇。狐鸞知之。約戰於城西。持蒲弓木戟。與子崔戰。而

死。孝子傳

子張

子張魯之鄙家也。呂覽

宰予

顏天冉疾。由醢予族。賜滅其鬚。見宏明集。予族事未詳出處。

子羔 子貢事同

幽通賦注。衛蒯聵之亂。子羔滅髡。衣婦人衣。逃出。孔惺求之不得。故免於難。又子貢滅髡為婦人。見論衡。

子思

子思居衛。二旬而九食。說苑

孟子

孟子惡敗而出妻。荀子

神農此下至幽王。凡六十八則。記帝王遺事。

神農生三歲。嬉戲之事。必於黍稷。史路

神農時。加米於燒石之上而食之。古史考

神農以石為兵。兵書

神農以上。水為玄酒。儀禮正義

吉禮始於神農。禮孔疏

神農分國。近國地廣。遠國地小。海上有十里之國。呂覽

神農之教。石城十仞。湯池百步。前漢書

神農之教。無食者與之陳。無種者貸之新。路史

神農之時。欲雨則雨。五日為行雨。旬日谷雨。旬五日為時雨。尸

神農之崩也。天下之人為之不將者七日。丹靈記

神農以丁亥日死。丁未日葬。五行書

黃帝立十年。知神農之非。而改其政。子今本無見釋史

堯

堯以楚伯受命。許慎

謁者。堯之尊官。所以試舜。百官志

堯之時。庶人未受命者。乘木車單馬。路史

堯試舜。舉之童土之地。路史

堯舉舜於雷澤。與之語。桑陰不移。而知其聖。慎子

堯在位三年。鷓鴣逃於絕漠。拾遺記

堯在位。一日而十瑞至。路史

舜

舜鼓瑟而黃河清。琴書

舜敦敏好學。尤長於天文。路史

舜耕歷山而交益。陶河濱而交禹。魯連子

舜澤旱。舜為耕者鑿瀆。狩則為獵者表虎。尸子

舜糶於平陽。賦真源

舜封黃帝之孫子。十有九人。韓詩外傳

舜封棄百里。封奚七十里。路史

舜以玉策書聖臣之名。金策書賢臣之名。銀策書功臣之名。水晶策書才臣之名。衆臣則書於木策。見識餘出

詳未

舜時西母。進益疆之版。路史注西王母西方昏荒之國

舜造漆器。諫者十餘人。見唐書語本韓非文小異

舜藏黃金於嶄巖之山。淮南子抵壁於谷。抱朴子

舜遭風雷。桴鼓播地。鐘磬亂行。舞人頓伏。樂正狂走。宋書

舜有天下。國之不服者十有三。荀子

使舜浚井。酖於觴酒。陸魯望雜記

禹

禹生於六月六日。吳越春秋注

禹十二爲司空。

子傳

堯封禹爲夏伯。

路史按世稱禹爲伯禹以此

禹巡蒼梧見市殺人下車而哭之。

陳蕃傳

禹之時民有鬻子者以歷山之金鑄幣而與之償。

路史注

禹之治水也民聚瓦礫。

呂氏春秋

禹治水掛冠不顧遺履不躡。

淮南子

禹治水先令而有功者殺之。

韓子

禹制喪法死於陵者葬於陵死於澤者葬於澤制喪三日毋得而逾。

尸子者淮南子云禹之時天下大水死陵者葬澤節財也

啓

隱神三年而戶來享。

魏靈性疏

湯

湯得七大夫以佐天下。

符子

桀自賢湯使人哭之。

通志

湯有天下國之不服者五十三。

韓子一文而國之一云禹作茵蓆影

王季

帝乙命王季爲西伯圖小戎。文王稱西伯蓋襲封也。

文王

文王伐崇至鳳凰墟。機繫而自結。韓非子帝王世紀作武王。

文王葬枯骨以王禮。賈子

武王

武王克殷。靖箕子之宮。呂覽按式闕封墓事。屢見靖宮事。僅見此。

武王之時。令人貂襜豹裘。方得入廟。一豹皮千金。功臣之家。糶千鍾。未得一豹皮。管子

武王征四方惡國九十有九。賈子

武王時。服國六百五十三。淮南子

桀

桀自謂天父。紂自謂天王。墨子

桀以人爲車。路史注

桀之時。女樂三萬人。放虎於市。觀其驚駭。管子

桀殺關龍逢。金版出於中庭。論語陰騭南史齊府僚勸進表云。玉馬駿奔表。徵子之去。金版出地。告龍逢之寃。金版語本此。

桀得岷山氏之二女。愛而無子。乃刻之苕華。而棄元妃於洛。路史注。二女曰琬。曰瑛。刻其名於苕華之玉。元妃妹喜也。

妹喜冠男冠傳元奏議

桀為長夜之宮。一夕而風沙填之。博物志

桀居南巢。從者五百人。三年死於亭山。尸子路史

紂

紂以熱升殺庖人。淮南子云。炮烙生於熱升。

紂作百里之宮七十三所。通志

紂飲酒以七日七夜。新序

紂刑鬼侯之女而取其環。路史

紂鹿臺大三里。高千尺。七年而成。新序

紂囿中所藏。虎二十有二。貓二。麋二千五百三十五。犀十有二。鼈七百二十有一。熊百五十有一。麋百一十有八。豕二百五十有二。貉十有八。麀十有六。麝五十。麋三十。鹿三千五百有八。古周書

幽

幽王時。牛化為虎。羊化為狼。述異記

后稷此下至張儀凡五十一

姜嫄衣帝衣。履帝敏。居期而生棄。衣路史僅見此。衣帝

堯使稷爲司馬。書刑德攷。鄭氏昏禮讀云。稷爲天官。

稷爲大田。路史。按稷官稱不一。疑猶今之兼歷大田農官蓋其本職。

后稷以癸巳日死。五行書。

皋陶

皋陶漁於雷澤。舜舉爲士師。路史。按人知舜漁雷澤而不知皋陶。

皋陶造律。傅子。律者皋陶之遺訓。漢命蕭何廣之急就篇云。皋陶造獄。

皋陶卒葬於皋。楚人謂之公琴。輿地廣記。鄆道元云。楚人謂冢爲琴。

伯益

伯益。皋陶之子。生五歲而佐禹。列女傳。

伯益佐禹治水。封之於梁。路史。

丹朱

丹朱有夜遊之臺。路史。

舜入唐郊。丹朱爲尸。墨子。

驩兜

驩兜爲堯司徒。古周書。

驩兜以佞臣狐功亡其國。路史

三苗

驩兜生三苗。高辛邦之。北經云驩兜生三苗。緇衣正義云高辛之諸侯。

三苗大亂。龍生於廟。犬哭於市。墨子

三苗之時。三月不見日。金匱

三苗之亡。五穀變種。鬼哭於郊。論衡

鯀

鯀爲三仞之城。淮南子

羽山名。懲父山。山南百步水常清。牛羊不敢飲。曰羽淵。襄字記

伊尹

伊尹帝之酒保也。鵠冠子

伊尹之興土功也。脩脛者使之踏鏗。強脊者使之負土。眇者使之準。偃者使之塗。淮南子

伊尹死。大霧三日。論衡

傅說

傅說賃爲赭衣者。舂於深巖。以自給。拾遺記

比干

紂無道。比干作秣馬金闕歌。昭洞歷記。

箕子

箕子教朝鮮以禮義。田蠶制八條之教。後漢書

夷齊

夷齊食薇三年。顏色不變。三秦記採葛食菜。二事已見第二卷。

周公

周公采於周。封於魯。老於周。路史

武王作周歷。周公作魯歷。董巴議

周公以玉笏賜孟岐。香案

周公蔡蔡而辟管。杜預訓蔡為放。

南人服象。為虐於彝。成王命周公以兵追之。至於海南。乃為三象樂。文選西征賦注。周公南征。

成王將加元服。周公使人來零陵。取文竹為冠。古今注

太公

呂望年七十。始學讀書。高誘注說林。

太公管爲灌壇令。博物志

太公望齊之逐夫。國策

太公望踞石隱崖。不餌而釣。膝處成臼。跗觸成路。符子

太公望壽一百六十。紫微斗數

召公

召公封燕。九世惠侯。始就國。其長居燕。而支襲召。王安石云。元子既國。燕次子守者。猶食召也。

周公攝位。召公爲尸。路史

召公爽壽一百九十餘。風俗通路史作一百八十

管仲

管仲嘗爲圉人。博物志

管仲作革。鬻冠子云。伊尹酒保。太公屠牛。管仲作革。百里官奴。酒保作革事。他書不載。

子產

子產治鄭。蒺藜不生。鷓鴣不至。天中記

子產有兄曰公孫朝。弟曰公孫穆。朝好酒。穆好色。列子

子產死。家無餘財。子不能葬。國人哀之。丈夫舍玦佩。婦人舍珠玉。其子不受。自負土葬於荆山。賈氏說林

孫叔敖

楚國之法。祿臣再世而收其地。惟孫叔敖九世而祀不絕。韓非子

孫叔敖作期思陂。而荆土用贍。林意

段干木

段干木。晉之大駟也。呂覽

梁惠王

梁惠王發逢忌。逢忌二地名。之藪以賜民。漢志注

張儀

張儀與蘇秦共翦髮相活。或傭力寫書。行遇聖人之文。無以題記。則以墨畫於掌中。夜還更以竹寫之。拾遺記

雜記此下類記四書所載人物雜事不必備錄錄其少見而可信者

記形體記十則

神農憔悴。堯瘦臞。舜黧黑。禹胼胝。淮南子

神農長八尺有七寸。路史

禹身長九尺二寸。世紀

夏禹長頸烏喙。歸雲集

帝堯長。帝舜短。文王長。周公短。孔子長。子弓即仲弓短。荀子

堯脩十尺。舜脩八尺。有奇。面頰無毛。孔叢子頰一作頰

湯皙容多髮。伊尹黑而短。安子瑛語

孔子身長十尺。大九圍。坐如蹲龍。立如牽牛。就之如昂。望之如斗。演孔圖

仲尼之狀。面如蒙。俱周公之狀。身如斷菑。皋陶之狀。色如削瓜。閔天之狀。面無見膚。傳說之狀。身如植鰭。

伊尹之狀。面無鬚。麋肩。同麋禹跳湯偏。堯舜三眸子。桀紂皆長巨。姦美。孫叔敖突禿長左。葉公子高。微小短。

瘠。行若不勝衣。非相篇

皋陶馬口。論衡

子產日角。晏平仲月角。尾生犀角。柳下惠史魚反角。管子

顏回角額似月形。論語識語

子貢山庭斗繞。摘輔象

記學計八則

堯學於君疇。疑即尹壽之麟舜學於務成昭。禹學於西王國。荀子

禹師墨如。周公師庶秀。潛夫論

堯學於尹壽。舜學於務成。湯學於成子伯。文王學於鉸時子思。武王學於郭叔。新序

文王師鬻子。又師鮫子。鮫子說字作鮫時子師。

散宜生、閔天、南宮适學於太公望。尚書大傳

孔子學於老聃、孟蘇、夔靖叔。呂覽

吳起學於曾子。田子方學於子貢。墨子學於史角。段干木學於子夏。呂覽

李克學於子夏。漢藝文志

記嗜好則計五

文王嗜昌蒲。武王嗜鮑魚。新書

公儀休嗜魚。外傳

齊桓公好服紫。鄒君好長纓。楚王好細腰。管子

齊宣王嗜鷄跖。呂覽云：善學者若齊王之食鷄也，日食其跖數千，而不以為足也。

楚狂接輿好食棗、盧木、蕪菁子。高士傳

記夢 夢不足記因論語有夢周公事附及之計九則

堯夢攀天而上。湯及天舐之。夢占逸旨

堯夢長人。溫子昇廟碑

舜夢長眉擊鼓。帝王世紀

禹夢自洗於河。世紀

禹未遇時。夢乘舟過月中。帖六

文王夢日月著其身。世紀

堯夢乘龍上太山。舜夢擊天鼓。禹夢其手長。湯夢布令天下。桀夢黑風破其宮。紂夢大雷擊其首。夢書

曾子夢見一狸無首。作殘形操。琴操

齊桓公夢為大禽所中。夢書

記刑計五

有虞之誅。以幪巾當墨。以草纓當劓。以菲履當剕。以艾鞞當宮。布衣無領當大辟。慎子

夏禹之時。大辟二百。周公之時。大辟五百。史記

殷之法。刑棄灰於街者。韓非子

周之盛時。羣飲者殺。史記

周之盛。殺人者。踣諸市。墨者使守門。劓者使守關。宮者使守內。剕者使守囹。完者使守積。前漢刑法志

記書計十

神農氏因上黨羊頭山。始生嘉禾八穗。作八穗書。用頒行時令。此下十則見唐章續五十六種書法神農以前戰國以後不錄依四書人物時代也

帝堯因軒轅靈龜負圖作龜書。

夏后氏作鐘鼎書以鐘鼎形爲象也。

湯時作倒雍書。

周文王時作虎書有虎不害人名駟虞因茲始也。

周文王赤雀銜書入戶武王丹鳥入室以二祥瑞因作鳥書又因素鱗躍舟作魚書。

周之媒氏作墳書。

周之伯氏作爰書文記笏武記爰因而制之。

仲尼弟子因西狩獲麟作麒麟書。

戰國時作傳信鳥跡書。

記撰箸依漢書藝文志所載四書中有撰箸者凡十五家計十六則

子思二十三篇子思箸篇目列儒家者流中

曾子十八篇曾子箸

漆雕子十二篇漆雕子箸藝文志注云漆雕開之後

宓子十六篇宓子賤箸三子篇俱列儒家者流

孟子一篇篇目列陰陽家是七篇及古本十一篇外又有此書

神農二十篇神農箸向別錄云疑李悝及商君所說

神農兵法一篇陰陽家相土耕種十四卷

伊尹五十一篇伊尹說二十篇注云其言淺薄似依託也

太公二百三十七篇太公望箸道家者流

管子八十六篇管夷吾箸道家者流

晏子八篇晏嬰箸即晏子春秋

師曠八篇晉師曠箸注云此列陰陽家又小說家載

墨子七十一篇墨翟箸之學不始於墨翟特由墨翟而盛所謂彌近理而大亂真也

張子十篇張儀箸者流

慎子四十二篇慎到箸者流

逢蒙射二篇蒙志作門師古曰即逢

右據漢藝文志四書人物中見一二或屬偽撰悉疏列之如右使承學之士有所攷而取擇云他如子夏詩序子貢詩不傳之類錄